

講錄之一
誦閑法師

大佛頂首楞嚴經序指味疏

上海佛書印
行局學海

大佛頂經序指味疏緣起

詳夫此經由來無序。先哲以會解之序移置經端者。喜其文義周足。經然故也。夫以疏序爲經序。可謂美善雙盡矣。第序與經時甚懸殊。是以箋釋者寡。今更予受。滬上龍華之請。將欲敷演斯經。法衆不下二千餘指。然皆庸學居多。尙不諳字義句節。安求理趣。時同學有請以此序裂句分章。略事訓釋。以使初機拾級臨高之助。既不獲辭。乃仿法華弘傳意。爲之編科列目。命筆疏通。原始要終。不日成帙。遂定名曰指味疏。意謂閱全經猶餐大鍋之膳。研是疏如嘗一指之味也。衆皆合十稱善。予曰。斯稿雖就。殊爲草率。自知下里巴歌。未敢聞諸郢客。惟望諸君弗憚繁瑣。必玩索而後得之。未始非供養海中之一滴耳。或謂初習教乘者流。既經義全疏。罔知底蘊。疏亦奚裨。予曰。子是何言歟。豈不聞慧學者務期宿見。博問者貴在先知。茲稿正爲初心入手時。易得全經綱要。使關節一清。無致問橋之歎。亦安患爲太早計耶。唯冀潛修上士。同志高人。先請熟讀經文。然後安心觀法。覽斯疏而通會忘言象。以冥符願。

觀亦卽一心三止。亦名圓頓止觀。以止觀不二故。六就止觀中言正助一雙者。圓頓止觀是正行。卽二十五門是。如其理障惑強。止觀功微。務須加持神咒。故有三七建壇經云。更以異方便。助顯第一義。正助並行。收功彌速故。七就正助中言行位一雙者。行有進趣之功。能趣卽三漸次所趣。卽五十五位。行必入位故。八就行位中言因果一雙者。行位未極。總屬因心。圓滿菩提。方稱果覺。因必尅果故。九就因果中言體用一雙者。自行因果是體。化他因果爲用。體必發用故。十就體用後言六卽一雙者。以自他俱有六卽義故。謂六分因果之事殊。卽顯凡聖之理等。明六義。不生上慢。明卽義。不生退屈。約性約理。則知六而常卽。言修言事。則知卽而常六故。今言大佛頂者。非因非果之妙性也。首楞嚴者。通因徹果之妙修也。是故出世行人。先須悟大佛頂理。了知五陰六入十二處十八界。本如來藏妙真如性。然後於陰入處界等諸法。隨拈一法。無非卽空卽假卽中圓三諦理。皆得爲所觀境。依境修觀。能觀之智。卽一心三觀。亦名一心三止。照真諦理。卽空觀。照俗諦理。卽假觀。照中諦理。卽中觀。空觀卽體真止。假觀卽方便隨緣止。中觀卽息二邊分。

止即空觀三觀即假觀止觀不二即中觀在因曰止觀在果曰定慧止觀功成即名首楞嚴王妙三摩提。以此爲因即名如來密因。修此一行具足菩薩萬行。大佛頂是所莊嚴首楞嚴爲能莊嚴。能所不二爲妙莊嚴。故曰十方如來一門超出妙莊嚴路。具詮諸義即名經。懸述綱要名爲敘也。合釋竟。

(乙)二離釋二初釋別題二釋通題 初又二初釋大佛頂二釋首楞嚴

今初

大佛頂三字事釋。理釋。古今疏解不啻盈棟。茲不暇錄。今直就一切衆生現前一念心性而發明也。以吾人現前一念之心。本非肉團。亦非緣影。實無方隅。亦無分劑。是故不在內外中間。無有前後。并無時劫。是故不屬過現未來。然此心非一切法。一切法不能收攝。而此心即一切法。一切法莫可逃遁。離即離非。是即非即。言語道斷。心行處滅。不得已強名曰大。非對小言大。以對小言大則大有分量。非真大故。亦非先小後大。以先小後大則大有始終。非本大故。要之十方無盡。三際莫窮。故言曰大。大有三義。一離過絕非義。即體大。二豎窮橫遍義。即相大。三具足恆

沙義。即用大。以吾人現前一念之心。靈明不昧。了了常知。故名曰佛。佛者覺也。覺有三義。一圓明獨照義。即自覺。二隨緣照了義。即他覺。三徹照心源義。即滿覺。以吾人現前一念之心。量絕邊涯。體尊無極。故名爲頂。頂有三義。一最尊義。一切諸法莫可比擬故。二不可見義。四過咸離。百非俱絕故。三放光現化義。隨緣普應。不染諸塵故。一字具三。三三具九。若細分之。義應無量。無量妙義。唯是一心。故言一心爲大佛頂。乃衆生之性德。爲當經之正體。仍遍爲一切諸大乘經之體。以如來所說一代時教。皆是稱性之談。故曰佛說上下法。唯是一心作。作是說者。名爲正說。若他說者。即波旬說。○復次若能悟斯大佛頂義。便能遍達全經妙義。茲當不避繁文。撮其樞要。略爲點示。經初阿難請妙奢摩它。三摩。禪那。最初方便。悟大義。是禪那之方便。悟佛義。是奢摩之方便。悟頂義。是三摩之方便。又體大。是禪那之方便。相大。是奢摩之方便。用大。是三摩之方便。又奢摩。是自覺。三摩是他覺。禪那。是滿覺。又禪那。是最尊。奢摩。是不可見。三摩。是放光現化。又三。卽一。是奢摩。卽三。是三摩。非一非三。而三而一。是禪那。又卽常住真心性淨明體。性明。是奢摩。卽

通眞實。卽用大。常眞實。卽體大。五會神咒。名摩訶悉怛多鉢怛囉。此云大白傘蓋。白。卽相大。傘蓋。卽用大。摩訶。卽體大。六十聖位。第三漸次文中云。一切如來密圓淨妙。皆現其中。圓。卽相大。淨。卽用大。密。卽體大。非一非三。而三而一。三一俱不可思議。曰妙。三一。一三。乃至佛頂各三。皆如上說。略點全文大旨竟。

(丁)二釋首楞嚴

首楞嚴三字。直指一切行人全性起修之性定。乃大定之略名也。具足應云大佛頂首楞嚴王。首楞嚴云。一切事畢竟堅固。今謂事言一切者。卽總收十法界之根身器界。所謂五陰六入十二處十八界七大也。言畢竟堅固者。畢竟卽徹底義。堅固卽常住義。所謂徹法底源。無動無壞也。意謂行者既悟大佛頂性。便能了知一切性。一切性一性。是故陰處界等一切諸法。一一無非大佛頂性。故曰本如來藏妙眞如性也。經云。色心諸緣。及心所使。諸所緣法。唯心所現。汝身汝心。外及山河虛空大地。咸是妙明眞精妙心中所現物耳。了知全性起修。自然全修在性。非離性外別有修也。以性無外故。○復次。只此修法。仍當會取經中修行妙旨。言

一切事畢竟空。修成奢摩它。真諦三昧。依畢竟假修成三摩鉢提。俗諦三昧。依畢竟中修成禪那中諦三昧。又三卽一。是真諦三昧。一卽三。是俗諦三昧。非一非三。而三而一。是中諦三昧。三一圓融。故名爲妙。只一三昧。統收一切三昧。故曰首楞嚴王。二十五聖所修三昧卽此三一圓融之三昧也。良以法門平等。原無優劣。且文殊獨選耳門爲最勝者。乃就當時一類之機。欲其就路還家耳。非有私於觀音也。大抵悟心大士。既悟大佛頂性。必能了達一切諸法平等之性。是故隨拈一法。皆得爲所觀境。皆具圓通常三真實義。非獨觀音爲然也。慧學之流。不可不知。是故余嘗謂靈峯旭祖。科前三卷半經。爲顯如來藏妙真如性。圓三諦理。以酬當機。最初方便之請。爲千古之獨唱。苟非升天台之堂。入聖祖之室者。安有若斯超邁之見。佛頂文句。詳明其旨。智者細心味之。自見其妙。前來一切三義。皆是不思議境。行者依之修觀。所觀之境。隨拈一法。皆具三諦能觀之心。隨舉一念。皆具三觀。亦卽三止。諦觀不二。止觀不二。故稱妙也。一切衆生。是理卽大佛頂首楞嚴。聞名生解。是名字卽大佛頂首楞嚴。圓起妙修。是觀行卽大佛頂首楞嚴。六根清淨。

是相似卽大佛頂首楞嚴。無明豁破。是分證卽大佛頂首楞嚴。五住究盡。是究竟卽大佛頂首楞嚴也。釋別題竟。

(丙)二釋通題

上六字是別名。乃一經所詮之法義。經敍二字是通名。經字別指當部能詮之文字。敍字單指此篇之別目也。言經者徑也。謂此經乃超凡入聖。返本還元之徑路也。敍者懸述也。謂懸述經中綱要。使後學開卷瞭然。如視諸掌也。又說此大義述此宏綱。名爲經敍。又大佛頂卽理經。首楞嚴卽行經。經敍卽教經。復次大佛頂序體。首楞嚴序宗。從性起修。修有伏斷。序用體宗。用次第不紊。序教立此爲題。序名三經具足。五支備周。言雖簡。意盡詳矣。釋題竟。

(甲)二釋文四初序一經大旨。二序十軸文義。三判正宗科節。四示藉教明心。初又四初提全文綱要。二顯一經獨勝。三彰名義因果。四明理行性修。今

首楞嚴經者。諸佛之慧命。衆生之達道。教網之宏綱。禪門之要關也。

此節總提全文之綱要也。初句標徵首楞嚴三字。如題釋者是徵起之辭。又卽物而觀墊之詞。將釋其中旨趣。先用者字墊之。引出文中所以也。次四句釋義。首句諸者衆也。有時處二義。舉時則攝過去。現在。未來。言處則該四方。四隅。上下。佛者覺也。覺有三義。一自覺。謂覺了自性眞常。悟知煩惱虛妄。二覺他。謂自旣覺悟。還須運無緣慈。普度未悟。三覺滿。謂窮源極底。福智圓明。三覺皆圓。萬德具足。故稱爲佛。此是極果之稱。若云當人自己。謂一念不迷。曰覺。覺者卽佛也。若一覺之後。不復更迷。如日出無暗。卽與佛同儔之者。語助之辭。句文不足。添之字助之。慧者照了之義。謂自性靈通。觸物卽了。命有二。一四聖。唯智爲命。二六凡。連持色心爲命。今言慧命者。唯指聖人。以智慧爲命也。意謂此經是十方三世諸佛之慧命。乃舉諸而顯一也。當知心佛衆生。三無差別。舉諸佛之慧命。卽顯我本師之慧命。顯本師之慧命。卽顯吾人之慧命。亦卽顯一切衆生之慧命。以吾人與衆生。卽未來之諸佛也。須知諸佛之慧命無他。卽吾人現前一念之心。故曰是心作佛。是心是佛。若離心言佛。卽同魔說。經中七處徵心。卽是正破妄執。密顯眞心。十番辨見。正

是徹底談心。陰入處界。就事顯心。地水火風。卽相明心。大衆圓悟。悟此妙心。便云。了然自知。獲本妙心。是故當機陳謝。直曰。不歷僧祇。獲法身。法身卽慧命也。明三如來藏竟。亦云疑惑消除。心悟實相。實相卽慧命之異稱也。豈非以現前一念之心。爲諸佛慧命之明證乎。其間明決定。審根本。定六根。陳圓通。攝心軌。則安立道場。乃至懸示六十聖位。是爲大開修證之門。修卽修此慧命。證卽證此慧命。非離此外。別有修證也。而後廣示七趣。詳辨五魔。無非指示現前一念迷悟之差別耳。迷卽迷此慧命。悟亦悟此慧命。要而言之。請此說此。解此修此。證此。迷悟差別。皆此也。故曰。是經者。諸佛之慧命也。二句言衆生者。十界中。唯除佛。可稱非衆生。其餘九界。皆是也。世間六凡。出世三聖。無明未盡。皆有生在。生必五衆和合而成。名衆生也。達道二字。各有二義。若謂達是通達。道是道理。卽指第一大科。悟圓理義。經云。爲令衆生修大乘者。通達實相。又云。疑惑消除。心悟實相之類。如謂達是了達。道是道路。卽指第二第三修證二大科。文經云。明了其家。所歸道路。又云。五十五位。眞菩提路。後文七趣昇沈。是未達道之差別。五魔擾亂。是行道路之差別。故

是經者衆生之達道也。三句教指佛說一大藏教。網是譬喻。言網目之多。喻佛
教門之多也。梵網經云。時佛觀諸大梵天王網羅幢。因爲說無量世界。猶如網孔。
佛教門亦復如是。言教門多者。如來說法。貴在逗機。機既萬殊。法亦千變。概而爲
語。有四種教。良以衆生流轉生死。止因二種無明。一迷中無明。二迷真無明。迷真
故有分段生死。迷中故有變易生死。而二迷復各有輕重不同。故界內外人又各
有利鈍根異。迷真重者。爲界內鈍根。非析空觀。莫生其解。故有藏教法起。輕者。爲
界內利根。非體空觀。莫逗其宜。故有通教法起。迷中重者。爲界外鈍根。非次第三
觀。莫治其惑。故有別教法起。輕者。爲界外利根。非一心三觀。莫開其悟。故有圓教
法起。就此四教。各有四門入道。謂有門空門。亦有亦空門。非有非空門。四教共一
十六門。又各具四種悉檀。謂衆生聞一一門。或得歡喜益。是世界悉檀。得生善益。
是爲人悉檀。得滅惡益。是對治悉檀。得入理益。是第一義悉檀。又有信行人。法行
人。自行化他等法門無量。故如網目之多也。宏大也。綱是綱口之大繩。謂綱領也。
網喻大藏諸經。綱喻楞嚴一經。意謂大藏中諸經無量。若謂開妙理之深藏。示修

證之大途。指迷悟之差別。明禪定之境相。明顯宣示。當遜斯經。故曰是經者。教網之宏綱也。末句。梵語禪那。此云靜慮。又云思惟修。通途言之。一切行門。皆禪也。所謂真諦三昧。俗諦三昧。中諦三昧。次第三昧。一心三昧。行爲入理之門。故曰門也。言禪門要關者。禪門二字。通指宗下參立行者。要關二字。的指斯經。以經中第一大科顯圓理文。正宗門中法身向上一著。第二第三二科開修證門。正悟後履踐。遠實事。第五科廣示七趣。第六科詳辨五魔。真宗門中之明鏡。所謂懸寶鏡於高堂。胡漢俱現是也。經云。不作聖心。名善境界。若作聖解。卽受羣邪。真照膽語。明指是經。凡參宗人。尤爲緊要。故曰禪門之要關也。要者的的不可少之謂。關者。阻節要會之處也。上來四句釋義。句句通論全文要旨。若分而論之。亦無不可。今略爲點示。首句是第一大科之要旨。謂顯圓理也。此理乃當人之妙心。卽諸佛之慧命也。二句是第二大科之要旨。謂示觀門也。觀爲能達理爲所達。自觀行至分證。皆名爲路。故曰衆生達道。三句是三四五科之要旨。大意謂悟此一心。則真如熏於無明。而成淨用。爲單復十二聖位。迷此一心。則無明熏於真如。而成染用。爲顛倒。

五魔也。斯文正如王度寶鏡。真禪門之要關也。提綱要竟。

(丙)二顯一經獨勝。三初明佛興。所以二明法化。所以三明獨勝。所以

今初

世尊成道以來。五時設化。無非爲一大事因緣。

此節明佛一代時教。發明性修行證。獨斯經爲最勝也。初句標佛興。世尊卽指本師。因修萬行。果彰萬德。二覺圓明。二嚴克備。爲世出世間九界衆生之所尊重也。圓滿具足曰成。至妙虛通曰道。謂本性圓明。道隆德備。卽成就無上正等正覺也。言我本師示迹於迦維衛國。淨梵王宮。爲悉達太子。捨金輪位。踰城出家。至雪山六年苦行。後於摩伽提國。菩提樹下。成等正覺。故曰成道。以來者。謂始自覺場成佛。終至雙樹泥洹。中間所歷之時也。二句明說法時者。時分有長短不同。長曰劫波。短曰刹那。言五時者。謂世尊五十年所說之法。大士結集成爲二藏。一大乘教。曰菩薩藏。二小乘教。曰聲聞藏。自法水東流。天台聖祖。智者大師。判二藏爲五時。

謂一華嚴時。二鹿苑時。三方等時。四般若時。五法華涅槃時。言設化者。設是施設。乃建立之義。化是化導。乃誘引之義。意謂如來一代時教。祖師判爲五時。總爲建立教化。誘引衆生。使人從言得旨。借教明心。此外更無餘蘊矣。三句正明所以。言無非者。出世度生。非爲別事也。故曰爲一大事因緣。一大事者。一指衆生之一心。大直指心之當體也。大義有三。謂體相用。如題釋。事是事業。指佛出世之事業也。衆生機感爲因。諸佛應化爲緣。爲者特特之謂也。意謂我本師世尊。自己徹證心性。受大法樂。以同體大悲。緣念衆生之苦。迷失本心。枉受輪轉。故爲特特出世。普令衆生覺悟自心。同受法樂而已。所謂唯此一事更無餘事。

(丁)二明法化所以

求其總攝化機。直指心體。發宣真勝義性。簡定真實圓通。

求參尋之意。言序主參尋如來。法化之所以也。其有所指的之辭。總統也。攝收也。化機二字。指衆生受化之機宜也。直謂正直。指謂指示。心體者。卽本經謂常住真心。性淨明體也。發是開啓之辭。宣是揚說之辭。從來不假。曰真。殊妙超特。曰勝。言

之所詮曰義理之異稱曰性言真勝義性者如來諸法性也。俗諦說出世法爲勝義諦。今所說者異乎常說。是勝義中之勝義。是故曰真曰性。卽第一義諦中道實相也。簡是選擇之謂。定是不易之謂。圓是具足不缺之義。通是融流不壅之義。無妄曰真。無虛曰實。言真實圓通者。意指耳根法門圓照三昧也。

(丁) 三明獨勝所以

使人轉物同如來。彈指超無學者。無尙楞嚴矣。

使令也。人靈也。以人爲百物之最靈也。轉是迴旋之義。物者浮塵境界也。同無異也。如來者諸佛之通號。謂後佛出世。如先佛之再來。乃倣同先德號也。此句意謂衆生所以不成正覺。同如來者。皆因不了萬法唯心。以凡外認物爲己。權小迷己爲物。總爲物轉。不能轉物。良以無始迷本如來藏心。轉變而爲藏識。法爾幻起。見相二分。爲色爲心。以凡外不知色心。乃真心之幻影。執爲實有。認以爲己。權小不知諸法。原由藏識變現。妄執心外實有。卽是迷己爲物。所以逐境遷移。動被所礙。

全無自由之分矣。是知物本是心。迷之反礙於心。譬如冰本是水。結之反礙於水。皆自迷而自礙耳。是故爲物所轉。卽名衆生。經云。自心取自心。非幻成幻。法是也。今言轉物者。乃轉見相二物也。以此二物。如蝸牛二角。出則成雙。入則一體。今但不隨境界分別。則見分泯。泯見分。則離一切身心執取。離執取。則相分自轉。所謂湛入合湛。歸識邊際。故得識精圓明。轉而成智。便是如來藏心。故曰若能轉物。則同如來也。經云。不取無非幻。幻法云何立是也。彈指者。手指與指。自相彈擊作聲。言其時之速也。超者。頓證之義。學者。切磋琢磨之謂。卽用功也。言無學者。卽無功用道。有大小乘之別。大乘。唯佛獨稱。小乘。指阿羅漢。謂研真斷惑。名有學。真窮惑盡。爲無學。今指小乘。言彈指超者。意顯斯經。不歷僧祇。獲法身。狂心若歇。歇卽菩提。可以頓超小果。言得道之易。猶彈指之頃也。無尙句。正顯獨勝。所以謂序主參。尋如來所說五時法化。若言總攝化機。直指心體。乃至使人彈指頓超。立地成佛。莫過高尙於斯經矣。